

Wolof - Xarekat Mbind - Soldiers Scriptures

Efes 6:10-18

- 10 Léegi nag doolewuleen ci Boroom bi, te soloo kàttanam gu mag gi.
- 11 Gànnaaayooleen yérey xarey Yàlla yépp, ngir man a jànkoonte ak pexey Seytaane.
- 12 Ndaxte ndëndu xare jib na, waxuma sunu diggante ak nit ñi, waaye ak kilifa yi yiy nëxal àddina si, ñuy kilifa yi ak ay boroom sañ-sañ, di gaayi Seytaane yi ci bérab yu kawe yi.
- 13 Kon nag gànnaaayooleen yérey xarey Yàlla yépp, ba man a jànkoonte jamono ju xeex bi taree, noot lépp te taxaw temm.
- 14 Taxawleen kon temm, geñoo dëgg te sàngoo njub, muy seen kiiraayu dënn.
- 15 Solooleen jàmm, ji xebaar bu baax biy joxe, ni ay dàll ci seeni tànk, ba jekk ci lépp.
- 16 Defleen it ngëm, muy seen pakk, ba man a fél jum yi leen Seytaane di fitt.
- 17 Defleen mucc, muy seen mbaxanam xare, ak kàddug Yàlla, muy jaasi ji leen Xel mu Sell mi tèggal.
- 18 Deeleen ñaan ci xeeti ñaan yépp ci kàttanu Xel mu Sell mi, te sax ci ak farlu gu mat sëkk, di ñaanal gaayi Yàlla yu sell yi yépp.

Sabóor 91:1-16

- 1 Ku dëkke kiiraayu Aji Kawe ji yaa këroo keppaaru Aji Man ji.
- 2 Dama naa Aji Sax ji: «Yaw laay làqoo, di la fegoo; ngay sama Yàlla ji ma doyloo.»
- 3 Kii kay moo lay musal cig fiir ak loraangey mbas.
- 4 Kiiraayam la lay sànge, nga yiiru, làqu; wormaam yéew la, di la aar.
- 5 Doo ragal njàqarey guddi mbaa fittu bëccëg
- 6 mbaa mbas mu yooteeg lëndëm, ak balaa buy fàdde njolloor.
- 7 Junni daanu fi sa wet, fukki junni (10 000) daanu fi sa ndijoor, du tax mu jege la.
- 8 Say gët nga ciy teg, di seetaan ku bon di jot yoolam.
- 9 Yaw mi mìkkaanoo Aji Sax ji, Aji Kawe jii di sama rawtu,
- 10 genn loraange du la dab, balaa du jege sa xayma.
- 11 Ay malaakaam la lay booleel, ñu di la sàmm foo jëm.
- 12 Seeni loxo lañu lay meebe, ba doo fakkastaloow doj.

- 13 Dangay falaxe jaan ak gaynde, di rajaxe ñàngóor ak siibi.
 14 Yàlla da naa: «Kii de man la safoo, ma di ko xettli. Man la xam, te maa koy teg fu wóor.
 15 Mu woo ma, ma wuyu ko; mook man ci biir njàqare, ma xettli ko, darajaal ko,
 16 reggal koy fan, baaxe ko samag wall.»

Sabóor 18:1-51

- 1 Mu jëm ci njiital jàngkat yi, ñeel Daawuda jaamub Aji Sax ji. Mu jagleel Aji Sax ji woy wii, bés ba mu ko xettle ci mboolem noonam, xettli ko it ci Buur Sóol. Kàdduy woy yaa ngii.
 2 Mu ne: Aji Sax ji, maa la sopp, yaw mi may dooleel.
 3 Aji Sax ji laay sës, mu di ma aar, di ma wallu. Mooy sama Yàlla, ji may sës, yiiru, fegu; mooy Boroom doole ji may musal, di ma làq.
 4 Ma woo Aji Sax, ji jara sant, rëcc noon, mucc.
 5 Buumi ndee tanc ma, walum kasara naq ma,
 6 buumi njaniiw laaw ma, dee ne jaas, di ma fiir.
 7 Ma jàq, woo Aji Sax ji, ne sama Yàlla wallóoy, mu dégge këram. Ma yuuxu, muy dégg.
 8 Mu mer, suuf yëngu, di ker-keri; kenuy tund ya jaayu, di reg-regi.
 9 Saxar di sël-sëlee ca wakkan ya, sawara boye ca gémmiñ ga, xal yu yànj tàkke ca.
 10 Mu firi asamaan, wàcc, niir yu fatt lal tànk ya.
 11 Ma nga war malaakam °serub, di naaw, daayaarloo laafi ngelaw.
 12 Ma nga bàddoo lëndëm, làqoo, làmboo ndox mu lëndëm ak i xàmbaar,
 13 leer a ko jiitu, xàmbaar ya topp ca, ak tawu yuur ak xali sawara.
 14 Aji Sax jee dënnoo asamaan. Aji Kawe jee àddu, muy tawub yuur ak xali sawara,
 15 mu soqiy fitt ak jumi melax, tasaare leen, félxe.
 16 Aji Sax ji, dangaa gëdd, nokki, mu riir, xuri géej ne fàñj, kenuy suuf ne duñj.
 17 Aji Sax jee yóotoo fa kaw, jàpp ma, seppee ma ca xóotey ndox ma,
 18 musal ma ca noon yu mag, ya ma bañ te man ma.
 19 Ñu dajeek man, bés ba ma jàqee, Aji Sax ji taxawu ma,
 20 yaatal ma, bége ma, ba xettli ma.
 21 Aji Sax jee ma yool sama njekk, samay loxoo set, mu fey ma.
 22 Sàmm naa yooni Aji Sax ji, bonuma, di moy sama Yàlla.
 23 Dama ne jàkk ndigalam yépp, xalabuma dogali yoonam.
 24 May ànd ak moom, di set wecc, di moyoo tooñ.

- 25 Aji Sax jee ma yool sama njekk, rafetlu sama mucc ayib.
- 26 Yaw Aji Sax ji, ku gore, fekk la gore; ku matale, fekk la matale;
- 27 ku sellal, fekk la sell; ku dëng, fekk laak say feem.
- 28 Yaw yaay musal xeet wu néew doole, kuy danjirral, nga detteel.
- 29 Yaw kay yaa may niital. Aji Sax ji sama Yàllaay leeral sama lëndëm.
- 30 Maak yaw kay, ma song gàngoor. Maak sama Yàlla, ma tëb um tata.
- 31 Yàllaa mat. Kàddug Aji Sax jee wér te wóor. Mooy feg képp ku ko làqoo.
- 32 Ana kuy Yàlla ku moy Aji Sax ji? Ku jara sës ku dul sunu Yàlla?
- 33 Yàllaa may dooleel, di ma xàllal, yoon mat.
- 34 Moo ma gaawal ni kewél, taxawal ma fu kawe.
- 35 Moo may tágat ngir xare, may bank xalag xànjar.
- 36 Aji Sax ji yaa may feg, musal ma, dooleel ma sa loxo, nangul ma, darajaal ma.
- 37 Yaa ma xàllal u yoon, ba duma térëf.
- 38 Ma dàq noon yi, dab leen, jekkli, doora dëpp.
- 39 Ma jam leen, jógatuñu, xanaa félëñu, ma joggi.
- 40 Sol nga ma dooley xare, sukkal ñi ma jógal, ñu féete ma suuf.
- 41 Won nga ma ndoddi noon, ma boole bóom bañ yi.
- 42 Ñu ne wallóoy, wall amul; ñu woo Aji Sax ji, faalewu leen.
- 43 Ma wol, ba ñu doon pënd, ngelaw wal, ma wetti ni banu mbedd.
- 44 Xettli nga ma ci bokk yiy fippu, def ma, ma jiite ay xeet; waaso wu ma xamul sax nangul ma,
- 45 ku ma ci dégg, déggal ma, ay doomi doxandéem di ma raamal,
- 46 ne yàcc, génne seeni tata, di lox.
- 47 Aji Sax jeey kiy dund. Kii ma sës a jara sant. Yàlla mi may musal moo màgg!
- 48 Mooy Yàlla ji ma feyul, nangulal ma xeet yi.
- 49 Xettli nga maak noon, kaweel ma, ma tiim ku ma jógal, xettleeti ma cib soxor.
- 50 Kon Aji Sax ji, ma sant la ci biir xeet yi, kañ la!
- 51 Yaay may sa buuru mbooloo ndam lu réy, yaay ji ngor ki nga fal, muy man Daawuda, di sama askan ba fàww.